



Ե Ր Կ Շ Ա Բ Ա Թ Ա Թ Ե Ր Թ

ՀՀ Դաշնակցության Արցախի Կենտրոնական Կոմիտեի պաշտոնաթերթ

Մենք համացանցում

[www.aparaj.am](http://www.aparaj.am)

## Խմբագրական

### Ադրբեջանի ահաբեկչությունը եւ միասնականության հրամայականը

Ադրբեջանի կողմից այս օրերին սանձազերծված պատերազմն ամենեւին պատահականություն կամ էլ թշնամու կողմից հապճեպ որոշում չէր, ասել է թե՛ պատերազմները նախօրոք են ծրագրվում:

Արդեն գաղտնիք չէ, որ ամեն մի պաշտոնական հանդիպումից առաջ Ադրբեջանն իր դեպրեսիան պարպում էր սահմանային լարվածության հրահրմամբ, ու արհամարհելով միջազգային կառույցների «խաղաղասիրական երկկողմ կոչերը»՝ ձգտում էր հակամարտության լուծումը մոտեցնել պատերազմի տարբերակին:

Այս պատերազմը մի օր պիտի սկսվեր, ու դա բուլորն էին գիտակցում՝ լավ ըմբռնելով Ադրբեջան պետության իսկությունն ու ալիեյան կլանի վերջին տարիների խարդախ գործողությունները:

Հիրավի, անպատժելիությունից հղիացած երկիրը պիտի մի օր պոռթկար ատելության ցասումով՝ միաժամանակ համոզված լինելով, որ վերջում միջազգային հանրության աջքին կխեղաթյուրի իրադարձություններն ու փաստերը իրեն հատուկ ոճով:

Այս պատերազմը փաստեց՝ Ադրբեջանի դեմ մենք մենակ էինք, ինչպես եւ նախորդ՝ Արցախյան պատերազմում: Ադրբեջանի դեմ մենք միասնական էինք, ինչպես եւ նախորդ պատերազմում ու ինչպես նախորդ անգամ. այս անգամ եւս համայն հայության միասնականության ուժն ու կամքը եղավ իրադարձար պարտադրողը: Այս պատերազմը, ինչպես նախորդը, տվեց նույն՝ ամենակարեւոր դասը՝ պետք է ամուր հենվել այս հողին, ունենալ մարտունակ ու զինյալ բանակ, ունենալ այնպիսի հայրենիք, որտեղ յուրաքանչյուր ոք իրեն է՛լ տեր, է՛լ պատասխանատու զգա: Նախորդ պատերազմը սկսեցինք «Միացում» կոչով. այս պատերազմը ցույց տվեց, որ այդ կոչի իրագործմանը հասնելու ճանապարհը պետք է սկսվի Մայր Հայաստանի կողմից Արցախի անկախության ճանաչումով...

Արցախյան պատերազմը ցույց տվեց, որ Ադրբեջանն ընդունակ է ամենամարդկային դրսևորումների, ահաբեկչական բնույթի ցանկացած գործողության: Այս պատերազմը նորից փաստեց այդ ճշմարտությունը:

Իրավամբ, Իսլամական պետության ու այլ վարձու ահաբեկչական խմբավորումների՝ Ադրբեջանի կողմից ներքաշումն այս պատերազմին, բացահայտ ահաբեկչություն էր:

Խաղաղ բնակիչների հանդեպ ցուցաբերած գազանային վայրագությունները, դպրոցներ ու մանկապարտեզներ ռմբակոծելը եւ մանկահասակ երեխաներին վիրավորելն ու սպանելը միայն ու միայն ահաբեկչին հատուկ ձեռագիր է:

Ադրբեջանի պաշտպանության նախարարի կողմից աշխարհի առաջ արված՝ Ստեփանակերտին հարվածելու բացահայտ հայտարարությունը, անտարակույս, ահաբեկչի մոլուցք է:

Արդ, ո՞վ է սանձելու ահաբեկչին եւ ե՞րբ...

Չարիքի բույնը պետք է ոչնչացվի, թե չէ այն չարիք կդառնա ամբողջ աշխարհի մարդկության համար: Ադրբեջանն արդեն իսկ այդ չարիքն է, որի դեմ միահամուռ պայքար է պետք, իսկ Արցախն այսօր հակաահաբեկչական պայքարի կիզակետում է...



©Vardan Petrosyan

### 4 օրյա պատերազմ. հրադարձարից 22 տարի անց

Հրադարձարից 22 տարի անց, ապրիլի 2-ին, հաշված ժամերի ընթացքում Արցախում վերսկսվեց պատերազմը: Հակառակորդը ձեռնարկել է բացահայտ հարձակողական գործողություններ դարաբաղա-ադրբեջանական սահմանի ողջ երկայնքով՝ այլ զինատեսակների հետ միասին օգտագործելով հրետանի, զրահատեխնիկա եւ օդուժ:

Հատկապես լարված էր հարավում եւ հյուսիսում՝ Հադրուբում եւ Մարտակերտում: Հրետակոծվեցին Մարտակերտի շրջանի Թալիշ, Տոնաշեն եւ Մատաղիս գյուղերը, որի արդյունքում երեք գյուղերի բնակիչները տարհանվեցին:

Մինչեւ ապրիլի 2-ի կեսօրը հայկական կողմը հայտնեց առաջին գոհի մասին՝ 12 ամյա մարտունեցի դպրոցական Վաղինակ Գրիգորյանը, ով իր եղբայրների եւ ընկերոջ հետ դպրոցի ճանապարհին էր, երբ 08:30-ի սահմաններում ՄՍ-21 («Գրադ») կայանքից իրականացրած հրթիռահրետակոծության արդյունքում զոհվեց, իսկ եղբայրներից մեկը եւ ընկերը վիրավորվեցին:

Այդ ընթացքում արդեն Արցախ էին տեղափոխվում հարյուրավոր

կամավորականներ Հայաստանի տարբեր հատվածներից: Հակամարտության երկրորդ օրը նրանք արդեն մեկնում էին ճակատային գիծ:

Պատերազմը շարունակվում է. ադրբեջանական կողմի կորուստների մասին հայտնի են դառնում նոր տվյալներ: Երրորդ օրը ԼՂՀ ՊԲ-ն հայտնում է դիրքեր եւ բնագծեր գրավելու մասին: Հառակորդը կիրառում է SOU ծանր հրետանային համակարգ, օրվա վերջում ադրբեջանական կողմի կորուստները հասնում է 29 տանկի, 4 անօդաչու սարքի:

Երեկոյան ԼՂՀ ՊԲ-ն հայտնեց ադրբեջանցի մոտ 200 սպանվածի մասին: Նույն օրը երեկոյան ՀՀ անվտանգության խորհրդի նիստի ժամանակ նախագահ Սերժ Սարգսյանը հայտնեց հայկական կողմի կորուստների մասին՝ 18 զոհ, 35 վիրավոր:

Ղարաբաղի զինվորական եւ քաղաքային հիվանդանոցներ են տեղափոխվում հարյուրավոր վիրավորներ:

Պատերազմի երրորդ օրը հրետակոծվեցին Մարտունի եւ Մարտա-

կերտ քաղաքները: Մարտակերտում ավերվեց 20 տուն, Մարտունիում վիրավորվեց մեկ քաղաքացի:

Ադրբեջանական լրատվամիջոցները միաբերան գրում էին, որ գրավել են Թալիշ գյուղը, սակայն Թալիշը գտնվում էր հայկական զորքերի իսկողության տակ: Նշվեց, որ նախօրեին դիվերսիոն խումբ է մտել Թալիշ, գնդակահարել եւ խոշտանգել գյուղի վերելում գտնվող առաջին տան տարեք 3 բնակիչներին: Դիվերսիոն խումբը շուտով ոչնչացվել է:

Պատերազմի 4-րդ օրը ՊՆ խոսնակը հայտարարում է, որ հայկական զինուժի հրետակոծությունից փախչող ադրբեջանցիներին կրակում են թիկունքից:

Հայկական կողմը հայտնում է նաեւ 26 անհայտ կորածների մասին:

Ապրիլի 5-ի ԼՂՀ ՊԲ տվյալներով՝ հայկական կողմն ունեցել է 29 զոհ (7 սպա եւ ենթասպա, 22 սերժանտ, շարքային, պայմանագրային զինծառայող) եւ 101 վիրավոր (20 սպա եւ ենթասպա, 81 սերժանտ, շարքային, պայմանագրային զինծառայող):

→ 2



### ԽՈՍՔ ՑՎԱԿԿՑՈՒԹՅԱՆ

ՀՀ Արցախի կառույցը իր խորին վշտակցությունն է հայտնում Ադրբեջանի կողմից վերջին օրերին հրահրված պատերազմում ՀՀ եւ ԼՂՀ սահմանների համար նահատակված զինծառայողների, ինչպես նաեւ հակառակորդի գնդակի զոհ դարձած խաղաղ բնակիչների ընտանիքներին ու հարազատներին:

ՀՀ Արցախի կառույցը կիսում է կորստյան մեծ ցավը եւ հավաստիացնում, որ ողջ ներուժով գորավիզ է հայ զինվորին, հայ մարդուն ու հայրենիքի պաշտպանությանը:

### 4 օրյա պատերազմ. հրադադարից 22 տարի անց

1 ← Ադրբեջանի ՉՈւ մարդկային կորուստները մի քանի հարյուրի են հասնում: Լրագրողներին ներկայացվեց գաղտնի ձայնագրություն, որտեղ խուճապահար ադրբեջանուհին պատմում էր ԼՂՀ սահմանին մոտ գտնվող քաղաքների հոսպիտալներում տիրող վիճակի, դատարկված սահմանամերձ գյուղերի, բանակում առկա խուճապի մասին: Կինը շարունակ կրկնում էր, որ պետք է հավատալ հեռուստացույցին, որով «1000 կորուստից միայն 1-ն է ներկայացվում»:

ՊԲ-ն կորցրել է 14 տանկ, իսկ Ադրբեջանի ՉՈւ-ն՝ 24 տանկ, նաեւ 4 ՅՄՄ (հետեւակի մարտական մեքենա), 1 ինժեներական տեխնիկա, 2 ուղղաթիռ,

12 ԱԹՍ (անօդաչու թռչող սարք), 1 «Գրադ» կայանք:

4-օրյա թեժ բախումներից հետո ապրիլի 5-ին երկու կողմերը հրադադարի պայմանավորվածություն ձեռք բերեցին՝ կրակոցները չլռեցին, սակայն ծանր զինտեխնիկա հիմնականում չէր օգտագործվում:

Հրադադարի համաձայնությունից հետո միայն Ստեփանակերտ ժամանեցին ԵԱՀԿ Մինսկի խմբի համանախագահները: Մինչ այդ, լրագրողների հետ հանդիպման ընթացքում ԼՂՀ նախագահ Բակո Սահակյանը հայտարարեց, որ Ստեփանակերտը պետք է բանակցությունների կողմ դառնա, այլապես

հարցը չի կարող խաղաղ լուծում ստանալ:

Համանախագահների հետ բանակցությունների ընթացքում էլ Արցախի երկինքը հանգիստ չէր: Հանդիպումների ժամանակ Ստեփանակերտի մատույցներում խոցվել է ադրբեջանական անօդաչու սարք, որի ձայները լսել են նաեւ համանախագահները: Խոստացել են Երեւանում հանդիպել լրատվամիջոցների ներկայացուցիչների հետ եւ համապատասխան հայտարարություններ անել, սակայն այդպես էլ որեւէ շոշափելի հայտարարություն չեղավ:

Ապրիլի 8-ին Կարմիր խաչի միջազ-

գային կոմիտեի ներկայացուցիչները ժամանել են Լեռնային Ղարաբաղ, շփման գիծ՝ հակամարտության մասնակիցների մահացածների մարմինները որոնելու համար:

Փոխանակման ընթացքում հայկական կողմին են փոխանցվել ԼՂՀ Պաշտպանության բանակի զոհված 18 զինծառայողների խոշտանգված մարմինները:

Քառօրյա պատերազմի արդյունքում հայկական կողմն ունի 74 զոհ, իսկ ադրբեջանական կողմը հայտնել է միայն իր 96 զոհվածների մասին, ոչ պաշտոնական տվյալների համաձայն՝ Ադրբեջանն ունի մոտ 2500 զոհ:

### Անհրաժեշտ է կազմաբանդել «Մադրիդյան սկզբունքները» եւ հրապարակ բերել նոր սկզբունքներ



պաշտոնապես կողմերին է ներկայացվել 2007 թվականին, դրան հաջորդող տարիներին ենթարկվել է որոշակի փոփոխությունների եւ համարվում է բանակցային գործընթացում առկա վերջին պաշտոնական փաստաթուղթը:

ՀՀԿ ԿԿ ներկայացուցիչ, ԼՂՀ ԱԾ «Դաշնակցություն» խմբակցության ղեկավար Դավիթ Իշխանյանը, անդրադառնալով վերոնշյալ սկզբունքներին, նշել է, որ 2007 թ. դրանց հրապարակումից հետո բազմիցս ՀՀԿ Արցախի կառույցն անդրադարձել է այդ հարցին՝ հայտարարելով, որ այդ սկզբունքները չեն բխում ոչ միայն Արցախի Հանրապետության, այլեւ հայ ժողովրդի եւ Հայոց պետականության շահերից:

«Մենք տարբեր առիթներով ասել ենք, որ պետք է ընդհանրապես կազմաբանդել այդ սկզբունքները եւ հրապարակ բերել նոր սկզբունքներ: Մեզ համար անընդունելի են այն կետերը, որի շուրջ բանակցում են կողմերը: Կարելի է առանձնացնել եւս մեկ հանգամանք.

առանց Արցախի Հանրապետության ուղղակի համաձայնության՝ որեւէ փաստաթղթի, որեւէ սկզբունքի ընդունում չի կարող մեզ համար ընդունելի լինել: Ըստ այդմ, անհրաժեշտ է ԼՂՀ-ի ներգրավվածությունը բանակցային գործընթացին», - նշել է Դավիթ Իշխանյանը:

Անդրադառնալով Արցախում միջազգային խաղաղապահ ուժեր տեղակայելու քննարկումներին՝ Իշխանյանը նշեց, որ 25 տարիների ընթացքում Արցախը կարողացել է իր առջեւ դրված խնդիրներն ինքնուրույն լուծել, ու Արցախում խաղաղապահ ուժերի տեղակայման խնդիր այսօր չկա:

«Ղարաբաղյան հակամարտությունը տարբերվում է այն բոլոր հակամարտության գոտիներից, որտեղ կիրառվել կամ կիրառվում են խաղաղապահ ուժեր: Մենք բավարար հնարավորություն ունենք սահմանի ամբողջ երկայնքով Արցախի եւ Արցախի ժողովրդի անվտանգությունն ապահովելու, եւ միջազգային փորձը ցույց է տվել, որ խաղաղապահ ուժերի տեղակայումը դեռ չի կարող երաշխիք լինել խաղաղության

պահպանման համար»:

Կարելի է նաեւ գիտակցել, որ քառօրյա պատերազմից հետո ստեղծվել է բոլորովին նոր իրավիճակ, եւ Ադրբեջանի կողմից 1994 թվականի հրադադարի ուղղակի խախտմամբ այդօրինակ մասշտաբով թելադրում են նոր սկզբունքների շուրջ քննարկումներ սկսել:

Դավիթ Իշխանյանը նշեց նաեւ, որ քառօրյա պատերազմը ցույց տվեց, որ մեր ժողովրդի անվտանգության հիմնահարցերը լիովին լուծված չեն, մասնավորապես՝ Արցախի հյուսիսային շրջանում եւ կենտրոնական հատվածներում. «Մարտակերտի շրջանի հյուսիսային հատվածը եւ Մարտունի շրջկենտրոնը դեռեւս ամբողջական անվտանգության բաղադրիչներով չեն ապահովված, եւ կարելի է գիտակցել, որ այդ տարածքներն անխոցելի դարձնելու համար մեզ անհրաժեշտ է ժողովրդի անվտանգությունն ապահովող եւ երաշխավորող ավելի ընդլայնված տարածք ունենալ: Կարծում եմ՝ այս ուղղությամբ ոչ միայն պետք է մտածել, այլ կոնկրետ քայլեր ձեռնարկել»:

*Արմինե ՆԱԻԻՅԱՆ*

### Ով առաջին գծում գտնվելու հնարավորություն չունի, պետք է նյութական օժանդակությամբ մասնակից դառնա հայրենիքի փրկությանը



նշեց, որ Բակո Սահակյանի հետ գրուցել են սահմանին տիրող իրավիճակի, վերջին մեկ շաբաթում արձանագրված իրադարձությունների մասին:

«Պարզ է, որ Ադրբեջանն ամբողջ ուժերով համընդհանուր հարձակում է գործել, եւ հստակ է՝ նա չի կարողացել իր առջեւ դրված ծրագիրն իրականացնել, ձախողել է: Մենք ոչ մի տարածք չենք կորցրել: Այդ առումով՝ մերը հաղթանակ է: Սա պետք է արձանագրվի որպես հաղթանակ: Իհարկե, հաղթանակը չի նշանակում վերջակետ, մի հանգրվանի վերջ: Պատերազմը կարող է եւ շարունակվել, մենք դրան պետք է պատրաստ լինենք», - ասաց Մարգարյանը:

Ըստ նրա՝ Արցախում ժողովուրդը մարտական է տրամադրված, չի ընկճված եւ պետք է ամեն ինչ արվի, որ դա պահպանվի: «Կարծում եմ՝ ով Ղարաբաղում առաջին գծում գտնվելու հնարավորություն չունի, նյութական իր

օժանդակությամբ պետք է մասնակից դառնա հայրենիքի փրկության, հայրենիքի պաշտպանության այս գործին: Մենք պետք է միաժամանակ պատրաստ լինենք նոր հարձակումների դիմադրվելուն, պետք է կառուցենք, վերաշինենք այն, ինչ ավերվել է Մարտակերտում, Թալիշում, Մատաղիսում: Դրա մեջ է մեր փրկությունը: Մեր գոհերը թանկ գոհեր են, բայց իմաստավորված է այդ գոհաբերությունը, որովհետեւ մենք պատվով ենք դուրս եկել: Անհավասար ուժեր են եղել, նրանք տեխնիկապես ավելի պատրաստված են: Հավանաբար, նավթի դուրսերն օգնել են, որպեսզի հնարավորություններ ձեռք բերեն, բայց մեկ է՝ ծրագրածը չեն հաջողել», - ասաց ՀՀԿ Բյուրոյի ներկայացուցիչը:

Խոսելով այս օրերին միջազգային հանրության արձագանքի մասին՝ Հրանտ Մարգարյանը կարծիք հայտնեց, որ առաջիկա օրերին ավելի մեծ արձագանքներ կարող են լինել, քանի որ Ադրբեջանը պատերազմական հանցագոր-

ծություն է կատարել՝ բավական չէ, որ նախահարձակ է եղել, նաեւ արգելված զենքեր է օգտագործել, անմարդկային միջոցների դիմել:

«Իբրեւ պատերազմական հանցագործ՝ Ադրբեջանն այսօր ամբաստանյալի աթոռին է նստած», - ասաց նա:

Անդրադառնալով այն հանգամանքին, որ՝ չնայած ձեռք բերված պայմանավորվածությանը, Ադրբեջանը շարունակում է խախտել հրադադարի ռեժիմը եւ կրակում է ոչ միայն Ղարաբաղի ուղղությամբ, այլ նաեւ՝ Հայաստանի, Մարգարյանը նշեց. «Այդ ամենը պետք է զսպվի՝ համապատասխան պատասխան տալով: Հանրային, միջազգային կարծիքի ձեւավորման գործում պետք է կարողանանք ակտիվ գործունեություն ծավալել, պետք է հարցերն անընդհատ արժարծված պահենք, ճնշենք Ադրբեջանին նաեւ քարոզչական, դիվանագիտական մակարդակում, որ նրանք պարտավորված լինեն նահանջ արձանագրել»:

*yerkir.am*

### Վահրամ Բալայան. Չի կարելի հույս դնել այս կամ այն երկրի վրա



«Ապառաժ»-ի թղթակիցը քառօրյա պատերազմի, դրա հետևանքների մասին խոսել է ԼՂՀ ԱԺ փոխնախագահ, Արցախի ԿԿ անդամ Վահրամ Բալայանի հետ:

**- Չինադադարից 22 տարի անց տեղի ունեցած 4-օրյա պատերազմը բոլորի համար անսպասելի էր: Եւ հիմա հաճախ է խոսվում թե՛ մեր բացթողումների, թե՛ առավելությունների մասին: Ի վերջո, ո՞րն էր այն ամենամեծ դասը, որ քաղցինը քառօրյա պատերազմից:**

- Այս պատերազմական գործողությունները ցույց տվեցին մեր առավելությունները, նաե՛լ խոցելի կողմերը: Գործնականորեն ապացուցվեց, որ հայկական բանակը տարածաշրջանում ամենահզոր ու կազմակերպված զորքն է: Այն հույսը, որ հանրությունը կպստեղ էր այդ ուժի՝ 18-19 տարեկան երիտասարդների հետ, արդարացվեց: Կարելի է նույնիսկ ռազմարվեստի ասպարեզում բացառիկ դեպքեր նշել, երբ սահմանում 30-40 հոգանոց ջոկատը դիմագրավել է թշնամու՝ թվով մի քանի հազարի հասնող ուժերին: Հայ զինվորն իր բարձրության վրա գտնվեց, մեր բանակի շնորհիվ երկրի սահմաններն անխաթար մնացին:

Երկրորդն այն է, որ հայ հանրությունը նորից ապացուցեց, որ միասնական է:

Տարիներ շարունակ շրջանառվում էր այն գաղափարը, որ հերթական պատերազմ լինելու պարագայում համայն հայությունը մեկ բռունցք չի դառնա, քանի որ մի մասն ինչ-ինչ պատճառներով հուսախաբված է: Բայց մի քանի օրվա ռազմական գործողություններն ապացուցեցին, որ համայն հայությունը միասնական է, եւ չդադարող կամավորների հոսքն էլ դրա վառ ապացույցն էր: Կամավորներ եկան ՀՀ տարբեր մարզերից, ինչպես նաե՛ւ՝ աշխարհի տարբեր ծայրերից մեր հայրենակիցները պատրաստակամություն հայտնեցին դառնալ հայրենիքի զինվոր: Վերջին օրերին Արցախի հասնող մեծ նյութական աջակցությունը, պատերազմի առաջին օրից ի վեր աշխարհի բոլոր անկյուններում տեղի ունեցող ցույցերը խոսում են այն մասին, որ համայն հայությունն ունի մեկ գերխնդիր: Արցախյան հարցը, ըստ էության դարձել է Հայկական Հարցի, Հայ Դատի մի անբաժանելի մասը. դա գիտակցում է ամեն մի հայ՝ անկախ նրա բնակության վայրից: Թե՛ ԼՂՀ, թե՛ ՀՀ քաղաքական ուժերը պարտավոր են այս նոր ձեւավորված իրավիճակն օգտագործել՝ ի մեկ Հայաստանի, որովհետեւ մեզ առաջիկայում դեռ շատ փորձություններ են սպասվում: Եվ այդ ամենը մենք կարող ենք հաղթահարել միայն ու միայն համատեղ, միասնական ուժերի միջոցով:

Վերջին երեք օրերի իրադարձություններն ապացուցեցին, որ բուն ԼՂՀ-ում ազգաբնակչությունը բավականին կազմակերպված է միասնական է: Այն ասեկոսությունները, որ երեկվա զինվորն այսօր չի ցանկանա նորից խրամատ մտնել՝ հօսք ցնդեց: Մեր զինվորներն ու ազատամարտիկներն ապացուցեցին, որ հանուն հայրենիքի անվտանգության կարող են մի կողմ դնել բոլոր տարածայնությունները եւ մոռանալ ցանկացած խնդիր:

Խոսելով մեր բացթողումների մասին՝ պետք է նշել, որ պետք է լրջագույն աշխատանք կատարենք ժամանակակից զենքեր ձեռք բերելու տեսանկյունից: Վերջին տարիներին Ադրբեջանի միլիարդների

հասնող ռազմական ներդրումները, ըստ էության, նրանց ավելի հավակնոտ ու ազդեցիկ է դարձրել: Դա ոչ թե վիստվելու, այլև մեզ լուրջ հետետեություններ անելու է մղում: Պետք է երկրի ներուժն ամբողջությամբ նպատակաուղղենք նոր ռազմական տեխնիկա ձեռք բերելուն:

**- Ի՞նչն է պատճառը, որ հայկական կողմը նոր զինտեխնիկա ձեռք չի բերել, կամ էլ համեմատաբար քիչ է ձեռք բերել, մասնավորապես, որ Ադրբեջանը երբեք գաղտնի չի պահել, որ զինում է իր բանակն առավել ժամանակակից զինտեխնիկայով:**

Միայն է ասել, որ վերջին 25 տարիների ընթացքում մեր ռազմական տեխնիկա: Այսօր մեր հրետանին, մեր համազարկային միջոցները, տանկային միավորումները դրա մասին են խոսում: Սակայն այդքանը բավարար չէ, որովհետեւ մենք հավակնում ենք ոչ միայն Ադրբեջանի դեմ պայքարելուն, նրա ահաբեկչական գործողությունները սաստելուն, այլև ժամանակն է, որ ՀՀ-ն եւ ԼՂՀ-ն իրենց ռազմական ներուժի շնորհիվ դառնան թելադրող երկրներ: Մենք դրա համար ունենք պատրաստակամ մարդկային ռեսուրս, բարոյահոգեբանական բարձր պատրաստվածություն: Սա ամենամեծ առավելությունն է, որ մյուս երկրները չունեն: Այդ ամենը պետք է համակցվի ավելի արդիական զինատեսակների հետ:

**- ՀՀ նախագահ Սերժ Սարգսյանը նշել է, որ մենք երբեք դեմ չենք եղել խաղաղապահ զորքերի տեղակայմանը: Որքանով է հուսալի խաղաղապահ զորքերը եւ որքանով է հուսալի մեր ռազմական գործընկեր Ռուսաստանը:**

- Ինձ թվում է, որ վերջին տարիների փորձը ցույց է տվել, որ չի կարելի հույսը դնել այս կամ այն պետության վրա, կամ ընդունել այս կամ այն երկրի հովանավորությունը: Դրանք խաբեկանք են: Դրանք ժամանակավոր են, եւ վստահելի չեն: Ժողովուրդն այս ամենը գիտակցում է ընկալում է, եւ դա ճիշտ է: Ընդհանրապես, պատմության բոլոր ժամանակահատվածներում, երբ հույսը դրել ենք մեր ուժի

վրա, մենք հաջողել ենք: Եվ ոչ հեռավոր անցյալի՝ 1992-1994թթ. իրադարձություններն ապացուցեցին, որ փոքր զինական ուժով, բայց մեր ժողովրդի եռանդով, հայրենասիրությամբ մենք կերտեցինք մեր հաղթանակը: Մենք հույս չունենք, որ այս կամ այն երկիրը, այդ թվում՝ Ռուսաստանը, մեր հարցերին լուծումներ է տալու:

**- Քառօրյա պատերազմի արդյունքում հայտարարվել է մոտավոր երկու տասնյակ հայ զինվորների խոշտանգված մարմինների մասին: ԼՂՀ-ն այս հարցով կդիմի՞ Հաագայի դատարան:**

- Մենք հենց առաջին օրվանից ԱԺ-ում ստեղծել ենք համապատասխան հանձնախումբ: Միաժամանակ նաեւ իրավասու մարմինների հետ ծավալուն աշխատանքներ է կատարվում, որպեսզի այդ փաստահավաք գործողությունները կատարվեն: Այդ ամենը պետք է փորձենք դնել միջազգային գործող օրենքների շրջանակներում: Առաջին իսկ հայացքից՝ բնականաբար հասկանալի է, որ սա ահաբեկչական պատերազմական գործողություն էր Ադրբեջանի կողմից: Միեւնույն ժամանակ, դա նաեւ մարդկության նկատմամբ հանցագործություն է: Այդ ամենը մեզ մտածելու տեղիք է տալիս: Եղած նյութերը պետք է ներկայացվի միջազգային ատյաններին եւ ցույց տրվի Ադրբեջանի իսկական դեմքը: Ցավոք սրտի, ժամանակի ընթացքում Ադրբեջանն իր լոբբիստական աշխատանքի, նավթադոլարների միջոցով ստեղծել է քաղաքական կեղտոտ գործիչների շրջանակ, որոնք անընդհատ պաշտպանում են այդ երկրին: Մենք պետք է նորից աշխարհի աչքերը բացենք: Կարծում եմ՝ այս վերջին օրերի տեղեկատվական դաշտում որոշակի տեղաշարժ է կատարվել: Կարծես աշխարհը նորից սթափվում է եւ հասկանում, թե իրապես ինչ է կատարվում այս տարածաշրջանում: Մենք բոլոր ճակատներով պետք է ծավալուն եւ նպատակային աշխատանք կատարենք: Նման գործելաճոճ կհասնենք հաջողության:

Արմինե ՆԱՐԻՆՅԱՆ

### Մեր զինվորները, հրամանատարությունը եւ պաշտպանության բանակը փայլուն կատարել է իր առջեւ դրված խնդիրը. Ա. Աղաբեկյան

ԼՂՀ փոխվարչապետ Արթուր Աղաբեկյանի հարցազրույցը Արցախի հանրային հեռուստատեսությանը

**- Ինչպե՞ս կորակեց այս պահին Արցախում տիրող իրավիճակը:**

- Այսօր մենք աշխատում ենք ռազմական դրության համապատասխան կարգով: Մեր երկիրն ունի նման մշակված պլան: Եթե համեմատենք նախորդ ռազմական գործողությունների հետ, երբ պետություն չենք ունեցել, բայց ստիպված ենք եղել ունենալ բանակ, այսօր մեր բանակն իր թիկունքում ունի պետություն, ունի ստորաբաժանումներ, եւ այդ ստորաբաժանումները գործում են ըստ համապատասխան պլանի:


Մենք գիտենք, թե ով որ պահի ինչ անելիքներ ունի: Ռազմական դրության շրջանակում շարունակվում է արտադրությունը, կարի արտադրությունները շարունակվում են անհրաժեշտ հանդերձանք կարել զինված ուժերի համար: Կառավարությունում գործում է շտաբ, որը համակարգում է օժանդակությունը զինված ուժերին, այդ թվում՝ ապահովում է մեր հայրենակիցների հետ կապը: Շտաբը գործում է շուրջօրյա ռեժիմով, շարունակվում է ընդունել գանգեր ու պահպանել պաշտպանության նախարարության հետ կապը: Ինժեներական ծառայու-

թյունների ուղղությամբ՝ քաղաքաշինության նախարարությունը շարունակում է կատարել իր պարտականությունները:

**- Որքանով էր անակնկալ վերսկսված պատերազմը հայկական կողմի համար:**

Ուզում եմ օգտվել առիթից եւ նշել հետեւյալը. Ի՞նչ անակնկալի մասին է

Սրանք գործողություններ էին, որոնք մեր զինված ուժերի համար տեսանելի էին: Մի օր պետք է սա տեղի ունենար: Մենք պետք է այս ամենը որակեց որպես պլանային գործողություն, որը չի հաջողվել ավարտին հասցնել: 1994-ին՝ զինադադար հայտարարելուց հետո, Ադրբե-



խոսքը, երբ մեկ տարուց ավելի է՝ մենք տեսնում ենք, թե հակառակորդն ինչպես է ակտիվացնում կրակն առաջնագծում, ինչպես են տեղաշարժվում դիպուկահարները, ինչպես է ամբողջ ճակատի երկայնքով օգտագործվում հրետանին:

ջանն ունեցել է կազմաքանդված բանակ: Այս տարիների ընթացքում հնարավորություն է ունեցել ե՛ւ բանակ ստեղծելու, ե՛ւ նոր սպառազինություն ձեռք բերելու: Միաժամանակ շարունակել է ճնշում գործադրել՝ լկտիաբար խախտելով զինա-

դադարի պայմանները: Փակելով միջազգային հանրության աչքերը՝ կարողացել է անցնել լայնամասշտաբ պատերազմական գործողությունների:

**- Այսինքն՝ մենք այս օրվան պատրաստվում էինք տարիներով:**

- Հավատացե՛ք՝ այդ: Ի՞նչ է արել մեր հակառակորդը: Հակառակորդի զինված ուժերը, ամբողջ բանակը՝ նախագահի գլխավորությամբ, պլանավորած գործողություն է սկսել ԼՂՀ սահմանների երկայնքով եւ իրականացրել ընդամենը դասակի, վաշտի խնդիր: Երեք օր հակառակորդը փորձում էր լուծել վաշտի խնդիր՝ վերցնելով ընդամենը ջոկի հեռակետ, եւ ռմբահարվելով՝ չկարողացավ զարգացնել առաջնադաշտը: Մեր ժողովուրդը պետք է իմանա այս մասին: Այսօր աշխարհը ծիծաղում է այդ բանակի վրա: Եվ պետք է առիթից օգտվել ու շնորհավորել մեր ժողովրդին այս հաղթանակի առթիվ:

**- Պրն Աղաբեկյան, կարծում եք, որ սա վերջին դասն է լինելու նրանց համար:**

- Ոչ, մենք իրավունք չունենք այդպես մտածելու: Մենք պետք է համարենք, որ մեր հակառակորդը չի լուծել իր խնդիրը 1992-ին, եւ չի լուծել նաեւ այս անգամ: Ցավոք սրտի, Ադրբեջանի հասարակությունը չի գիտակցում այս պարտությունը: → 4

# Մեր զինվորները, հրամանատարությունը եւ պաշտպանության բանակը փայլուն կատարել է իր առջեւ դրված խնդիրը. Ա. Աղաբեկյան

**3** ← - Դուք կոփվել եք նախկին պատերազմում, եւ, որպէս ազատամարտիկի, կուզեմ հարցնել՝ Դուք որակական տարբերություն տեսնո՞ւմ եք այս եւ անցած պատերազմի միջեւ:

- Սկսած այն ժամանակներից, որ պատերազմը սրով ու վահանով էր, եւ մինչեւ այսօր, երբ աշխարհը խոսում է մեծ ու գլոբալ պատերազմների մասին, շատ մեծ տարբերություն չկա: Պատերազմի ամբողջ ընթացքում թիրախը մարդն է: Եվ պիտի գիտակցես, որ մարդու մի ոչնչացումով ես դու հասնում հաղթանակի: Եթե այս տեսանկյունից ես նայում, ապա մեծ տարբերություն չկա: Այն ժամանակ եւ հիմա հրամանատարը խնդիր ունի իր կամքը պարտադրել իր ենթականերին եւ հակառակորդին: Այդ դեպքում է միայն մարտն ավարտվում հաղթանակով: Մարտավարության կանոնները բոլոր ժամանակներում էլ մնում են նույնը: Նախկին շրջանում ռազմական գործողությունները վարելիս՝ մենք ունեինք հասարակություն, որտեղ ամեն մեկն իրեն զինվոր էր զգում, եւ զգում էր ոչ միայն հոգով, այլեւ մասնակցությամբ: Այն ժամանակ մարդկային ռեսուրսների սահմանափակում ունեինք, եւ ստիպված էր մի ազատամարտիկը մի քանի ազատամարտիկի խնդիր կատարել: Հիմա ունենք կանոնավոր

բանակ:  
- Ի՞նչ կասեք մի քանի ժամկա ընթացքում տեղի ունեցած մասնակի գորահավաքների մասին:

- Աննախադեպ բան տեղի ունեցավ 3 օրվա ընթացքում: Որոշում կայացվեց, որպեսզի անցկացվի մասնակի գորահավաք: 1995-ից հետո հարյուրավոր գորավարժություններ ենք անցկացրել, բանակը տարին ամսվա 2 անգամ գորահավաք է անցկացրել՝ սպասվող ապագա մարտերին գորահավաքները գրագետ կազմակերպելու համար: Վերջին 3 տարիներին ես հաճախ ակնատես եմ եղել տարբեր դժգոհությունների, երբ թե՛ բանակի գործողություններն էին արժանանում քննադատության, թե՛ գորահավաքի կազմն էր արժանանում քննադատության, երբ չկամությամբ էին մասնակցում այդ գորավարժություններին: Բայց գիտակցելով, որ ընթանում է ռազմական գործողություն, չնայած հայտարարված մասնակի գորահավաքին՝ բոլորն եկան: շատերին ստիպված հետ ուղարկեցին:

- Պրն Աղաբեկյան, այսօր շատ է խոսվում Ադրբեջանի կողմից գրավված հեռակետերի մասին: Ի՞նչ ռազմավարական նշանակություն ունեն դրանք:

Ես արդեն նշեցի, որ ընդամենը վաշտի խնդիր կատարեց: Եվ 3-4 դիրք հիմա

գտնվում է հակառակորդի վերահսկողության տակ, բայց ընդամենը ջոկի նշանակության դիրքեր: Այդ դիրքերը իրենց նշանակությունն ունեն 500 մետր խորության մեջ, 500 մետր խորությունից հետո իրենց նշանակությունը կորցնում են, որովհետեւ ջոկի թիկունքում կա դասակի հենակետ, որն ունի ավելի մեծ խորության խնդիր՝ 1,5 կմ, 2 կմ: Օգտվեմ առիթից եւ ժողովրդին ասեմ, որ ռազմավարական դիրքը նշանակում է մի անբողջ լեռնաշղթա, ռազմավարական մեծ ճանապարհներ, եւ միայն դրանց վրա վերահսկողությունը կորցնելուց հետո կարող ենք խոսել մասնակի պարտության մասին: Բայց, երբ հակառակորդն ընդամենը 3 ջոկի դիրքի է տիրապետում, դա ռազմավարական նշանակություն չունի: Ամենահզոր զենքը մարդն է, եղել է մնում է այն զինվորը, որն իր կամքը կարողացել է պարտադրել թշնամուն: Այս հաղթանակի գրավականը մեր զինվորի կամքի պարտադրումն էր թշնամուն: Առաջին վայրկյաններին, այո, թերություններ ունեցանք, հակառակորդը կարողացավ մեր ջոկի դիրքերը վերցնել, ցավոք, գոհեր ունեցանք: Բայց ես ուզում եմ բարձրաձայնել, որ մենք մարտական խնդիրը կատարել ենք, մեր զինվորները, հրամանատարությունը եւ պաշտպանության բանակը փայլուն կատարել է իր առջեւ դրված խնդիրը:

Գնահատենք նաեւ հետեւյալը, որ մեր քաղաքացիները բացառիկ սառնասրտություն ցուցաբերեցին: Շատ երկրներ կերպարեն, որ իրենց ժողովուրդն այսպիսի սառնասրտությամբ ընդունի պատերազմի մարտահրավերը: Ականատեսը եղանք հանուն հաղթանակի բացառիկ համախմբման:

- Ի՞նչ ակնկալեք պայմանավորված զինադադարից :

- Տարբեր ակնկալիքներ պետք է ունենանք: Բանակը պետք է իմանա, որ իր մարտական խնդիրը չի փոխվել, պետք է շարունակի պաշտպանություն իրականացնել: Կառավարությունը պետք է շարունակի այս ռեժիմով աշխատել, քանի որ՝ այն բացերը, որոնք առաջացել են ռազմական գործողությունների հետեւանքով, չեն փակվել: Եվ պիտի համարենք, որ՝ քանի այս հրադադարը, այս ժամանակավոր հրադադարը չի վերածվել խաղաղության պայմանագրի, մեր երկիրը պետք է ամեն օր պատրաստվի պատերազմի, որով պարտադրելու ենք թշնամուն խաղաղություն: Այս փորձությամբ Ադրբեջանը հասկացավ, որ ո՛չ ռազմական գործողություններով, ո՛չ շրջափակումով, ո՛չ տեղեկատվական պատերազմով չի կարողանա կոտրել մեր ժողովրդի կամքը:

## Հայաստանը չի երկնչելու մտնել պատերազմի մեջ

ԵՅԿ անդամ երկրների դեսպանների հետ ՀՀ նախագահ Սերժ Սարգսյանի հանդիպումը եւ նրանց հղված ուղերձները ոչ միայն գնահատականներ են պարունակում դարաբաղա-ադրբեջանական սահմանագծին ապրիլի 1-ից ստեղծված իրադրության վերաբերյալ, այլեւ բացահայտում են հիմնահարցի կարգավորման առումով հայկական կողմի դիրքորոշումների եական փոփոխությունները:

Առաջին կարեւոր ուղերձը միջազգային հանրությանն ուղղված՝ նկատելիորեն կոշտ մեղադրանքն էր Ադրբեջանի ագրեսիվ քաղաքականության եւ բանակցային գործընթացից փաստացի միակողմանի հրաժարվելու իրողության հանդեպ մինչեւ այսօր անտարբերություն ցուցաբերելու համար: Ելնելով նրանից, որ պաշտոնական Բաքուն արդեն խոստովանել է, որ ինքն է նախահարձակ եղել, նախագահը պահանջեց դրա համար բացատրություններ պահանջել Բաքվից: Բայց լուրջ պատերազմի ընթացքի պարագայում դա արդեն գրեթե եղանակ չի ստեղծում. բոլորը հստակ գիտեն, որ այս արկածախնդիր քայլի նախաձեռնողը Ադրբեջանն է: Երկրորդ՝ հետագա ցանկացած գործընթաց կառուցվելու է ոչ թե 1994թ. հրադադարի, այլ 2016թ. ապրիլի 1-ին վերսկսված լայնածավալ ռազմական գործողությունների արդյունքներով:

Ռազմական գործողությունների հանդեպ ԵԱՀԿ ՄԽ համանախագահող երկրների փաստացի կրավորական մոտեցումը եւ կրակը դադարեցնելու՝ երկու կողմերին ուղղված նրանց հերթապահ հայտարարությունները ցույց են տալիս, որ մեծ հաշվով ոչ թե իրավիճակը հնարավորինս արագ կայունացնելու, այլ ռազմական գործողությունների արդյունքում կողմերից որեւէ մեկի տակտիկական պարտությունը բանակցությունների նոր

մեկնարկ դարձնելու նպատակ ունեն: Այսինքն՝ առաջնորդվում են այն սկզբունքով, որ ստատուս քվոյի որոշակի փոփոխությունը՝ անկախ նրանից՝ կողմերից որի օգտին կլինի, դարձնել բանակցությունները վերսկսելու նոր մեկնակետ:

Երկրորդ ուղերձն այն էր, որ եթե միջազգային հանրությունը որեւէ քայլ չձեռնարկի Ալիեւին ուշքի բերելու համար, ապա Հայաստանը ճանաչելու է ԼՂՀ-ի անկախությունը եւ անմիջականորեն մտնելու է պատերազմի մեջ ԼՂՀ-ի անվտանգությունն ապահովելու նպատակով: Դա ոչ միայն նշանակում է դուրս գալ բանակցություններից եւ սկսել լայնածավալ պատերազմ ԼՂՀ-ի համար, այլեւ նախադրյալներ ստեղծել դրանում տարածաշրջանային երկրների ներքաշման համար, այսինքն՝ պատերազմին առնվազն տարածաշրջանային մասշտաբներ հաղորդել: Ընդ որում՝ նախագահը հասկացրեց, որ սա արդեն գործողության մեջ գտնվող քաղաքականություն է, քանի որ արդեն ԱԳՆ-ին հրահանգել է ԼՂՀ-ի հետ ռազմական փոխօգնության պայմանագիր մշակել, իսկ նման պայմանագրի ստորագրումը փաստացի ԼՂՀ-ն ճանաչելու իրավական քայլ է:

Երրորդ՝ Սերժ Սարգսյանը հասկանալի դարձրեց, որ, անկախ վերասանձագերծված պատերազմի էլքից, սա արդեն նոր ստատուս քվո է, եւ հիմնահարցի լուծումը պետք է նոր էջից սկսվի, որտեղ Ադրբեջանը պետք է ոչ թե Հայաստանի հետ բանակցություններ վարի, այլ Ստեփանակերտի: Այսինքն՝ արդեն հիմա, կտրուկ փոխելով կուրսը, Հայաստանը դնում է կարգավորման հետագա հնարավոր բանակցություններում թե՛ ԼՂՀ-ի պարտադիր ներգրավման եւ թե՛ ԼՂ ժողովրդի ինքնորոշման իրավունքը ճանաչելու պահանջը:

Պարզ է, սակայն, որ միայն այդ մասին հայտարարությունը բավարար լինել չի կարող: Ինչպես միջազգային հանրությունը, այնպես էլ հատկապես Բաքուն դրան կհամաձայնեն միայն հարկադրաբար՝ հայկական բանակի այնպիսի առաջխաղացման, ռազմաճակատում ուժերի այնպիսի նոր դասավորություն սահմանելու պայմաններում, երբ Բաքուն ստիպված կլինի կա՛մ հայկական կողմին խնդրել կանգ առնել, կա՛մ, որպես միջանկյալ լուծում, սկսել բանակցությունները: Մինչեւ այդ հարցը ռազմաճակատում հայկական բանակը չլուծի, թե՛ բանակցություններում ԼՂՀ-ի ներգրավման եւ թե՛ առաջնահերթորեն ԼՂՀ-ի կարգավիճակի որոշման ուղղությամբ որեւէ տեղաշարժ սպասել չի կարելի:

Չորրորդ՝ Սերժ Սարգսյանը հայտարարեց, որ Հայաստանը եւ Լեռնային Ղարաբաղը կողմ են ռազմական գործողությունների դադարեցմանը, 1994թ. զինադադարի ռեժիմին վերադառնալուն եւ բոլոր գորամիավորումների՝ մինչեւ 2016թ. ապրիլի 1-ի իրենց զբաղեցրած դիրքերն ու գորանոցները վերադառնալուն: Առաջին հայացքից թվում է, թե սա նահանջողական ուղերձ է եւ հակադրվում է նոր ստատուս քվո հաստատելու՝ նրա վերոնշյալ ուղերձի էությունը: Սակայն հարկ է ուշադրություն դարձնել, որ նախագահն այս առաջարկն անում է հայկական զինված ուժերի առաջխաղացման պայմաններում:

Թե՛ 1994թ. զինադադարի պայմանագրին վերադառնալու պատրաստակամությունը դրսեւորումը եւ թե՛ հակառակորդի ձեռքում դեռեւս ԼՂՀ մոտ 200 քմ տարածք լինելու մասին տեղեկացումը, թերեւս, պետք է դիտարկել միայն հիբրիդային պատերազմի դիվանագիտական գործիքի համատեքստում՝ որպես մի-

ջազգային հանրությանը հայկական կողմի խաղաղասիրությունը, կրակի դադարեցման կողմնակիցը լինելու հանգամանքը ներկայացնելու միջոց: Այլ կերպ ասած՝ սա կարող է դիվանագիտական-քարոզչական քայլ լինել՝ չեզոքացնելու համար նախօրեին Բաքվից արված այն անհիմն եւ կեղծ հայտարարության էֆեկտը, թե Ադրբեջանը միակողմանի դադարեցնում է ռազմական գործողությունները եւ ամրապնդվում իր «ազատագրած» նոր տարածքներում:

Նախկին հրադադարի պայմաններին եւ բնագծերին վերադառնալը գուցե երկարատեւ ու ռեսուրսատար մասշտաբային պատերազմից խուսափելու հեռահար նպատակ է հետապնդում: Թերեւս դրանով էր պայմանավորված նախագահի կողմից արված՝ զինադադարի հետաքննության մեխանիզմների շտապ ներդրման, ԼՂ հակամարտության հարցերով ԵԱՀԿ գործող նախագահի անձնական ներկայացուցչի մոնիտորինգային կարողությունների, շփման գոտում դաշտային օգնականների քանակի զգալի ավելացման առաջարկները: Եթե այդպես է, ապա չի կարելի բացառել, որ հայկական կողմի տակտիկական նպատակներից մեկը, գուցե՝ նվազագույնը, որով կարող է բավարարվել՝ ռազմական գործողությունները դադարեցնելու համար, այդ մեխանիզմների ներդրման ռազմաքաղաքական պայմանների ստեղծումը եւ Ադրբեջանին այս հարցում կառուցողականության դաշտ բերելն է: Համենայն դեպս, հիմա դիվանագիտությունը թելադրվում է արցախյան ռազմաճակատից, եւ այլ տարբերակ հայկական երկու պետությունները չունեն, քան թելադրողի կարգավիճակով հանդես գալը: Հակառակը կլինի վերջի սկիզբը:

Գեորգ ԴԱՐԲԻՆՅԱՆ

### Եվրախորհրդարանում կոչ են արել ճանաչել ԼՂՀ անկախությունը

Եվրախորհրդարանի՝ ապրիլի 12-ին կայացած լիագումար նիստում, ի թիվս այլ հարցերի, անդրադարձ է արվել նաև Ղարաբաղում ստեղծված իրադրությանը:

Ապրիլի 2-5-ը դարաբաղա-ադրբեջանական սահմանին ծավալված պատերազմական գործողությունների վերաբերյալ ելույթով հանդես է եկել ԵՄ արտաքին հարաբերությունների և անվտանգության քաղաքականության հարցերով գերագույն հանձնակատար Ֆեդերիկա Մոգերինին: Նա մասնավորապես հայտարարեց. «Մենք մեծացնում ենք մեր ջանքերը հակամարտության կարգավորման նպատակով»: Ըստ Մոգերինի, հակամարտությունը շարունակում է սպառնալիք հանդիսանալ տարածաշրջանային անվտանգությանը:

«Հարավային Կովկասը կարելի է օգտագործել Եվրոպայի համար», - նշեց Եվրամիության արտաքին քաղաքականության պատասխանատուն:

Ընդգծելով, որ հրադադարի խախտման ծավալներն անսխադեպ են 1994 թվականից հետո, Ֆեդերիկա Մոգերինին նաև ուշադրություն հրավիրեց պաշտոնական Երեւանի և Բաքվի հայտարարությունների վրա, ապա գնահատեց. «Մենք ունենք լուրջ վտանգներ, եթե իրավիճակն անհապաղ չհանդարտվի»:

Մոգերինին հիշեցրեց, որ ապրիլի 2-ից սրված իրավիճակի կապակցությամբ կապ է հաստատել Հայաստանի և Ադրբեջանի արտգործնախարարների հետ, ապա ավելացրեց, որ առաջիկայում կշա-

րունակի նրանց հետ քննարկել իրավիճակը:

Մոգերինին Եվրոպական խորհրդարանի ներկայացուցիչներին դիմեց Հայաստանի և Ադրբեջանի քաղաքական մարմինների, հասարակական կազմակերպությունների հետ շփումների միջոցով խնդրի կարգավորման աջակցելու



խնդրանքով և վերահաստատեց. «Ավելի քան պարզ է՝ հակամարտությունը չունի ռազմական լուծում»:

Ղարաբաղյան հակամարտության գոտում լարվածության աճի մասին ելույթ են ունեցել նաև մի շարք եվրախորհրդարանականներ, որոնց մեծ մասը հանդես է եկել հայամետ դիրքորոշմամբ:

Այսպես, Չեխիան ներկայացնող Եվրպատգամավոր Յարոմիր Շտեյնհան իր ելույթում մասնավորապես ընդգծել է այն հանգամանքը, որ Մինսկի խմբի համա-

նախագահները կոչ են անում Հայաստանի և Ադրբեջանի նախագահներին՝ ընդունել հրադադարի խախտումների հետաքննության մեխանիզմի ներդրման առաջարկությունն այն պարագայում, երբ Հայաստանն արդեն դրան համաձայնել է:

Կիպրոսը ներկայացնող Եվրպատ-

գամավոր Մավրիցիոս Կոստասը ես իր ելույթում Եվրախորհրդարանականների ուշադրությունը հրավիրել է հրադադարի ռեժիմի խախտումները հետաքննող մեխանիզմների կիրառումից Ադրբեջանի հրաժարվելու փաստի վրա: Եվրախորհրդարանում ունեցած ելույթի ժամանակ Կիպրոսի մեկ ուրիշ ներկայացուցիչ՝ Էլենի Թեոխարուսը, նշել է, որ Ղարաբաղի բնակչության նկատմամբ Ադրբեջանի սանձազերծած վերջին հարձակումների առնչությամբ ԵՄ-ն պետք է պատժամի-

ջոցներ կիրառի վերջինիս նկատմամբ: «Եվրամիությունը պետք է աջակցի Ղարաբաղի ժողովրդին, որը պայքարում է իր ազատության համար: Մենք պետք է ճանաչենք Լեռնային Ղարաբաղը և պատժամիջոցներ կիրառենք Ադրբեջանի նկատմամբ: Դա մեզ կմոտեցնի խաղաղության հաստատմանը», - ասել է Թեոխարուսը:

ԼՂՀ ճանաչման կոչով հանդես է եկել նաև ԵՄ Լյուքսեմբուրգից ընտրված պատգամավոր Ֆրենկ Էնգելը: «Միակ բանը, որ այս դեպքում պետք է տեղի ունենա, ԼՂՀ ճանաչումը կլինի», - ասել է նա: «Ադրբեջանն այսօր մտնում է ագրեսոր, ինչպես ագրեսոր էր 24 տարի առաջ: Նա շարունակել է խախտել հրադադարի ավելի փոքր մասշտաբով և շատ երկար ժամանակով, և դա անում է, որովհետև համոզված է, որ բոլոր հայերն այդ տարածաշրջանում պետք է անհետանան», - նշել է պատգամավորը՝ հավելելով, որ Ադրբեջանն է, որ չի ուզում որեւէ փոխզիջման գնալ:

Լյուքսեմբուրգի խորհրդարանականը Հայաստանի և Ադրբեջանի հնարավոր փոխզիջումների հարցի մասին խոսեց՝ հիշատակելով Բաքվում ազգային հերոսի դափնիների արժանացած Ռամիլ Սաֆարովին, որին Էնգելը որակեց դաժան մարդասպան:

Ըստ պատգամավորի՝ միակ բանը, որ պետք է տեղի ունենա առկա իրավիճակում, Լեռնային Ղարաբաղի անկախության ճանաչումն է:

«ԱՊՍՈՒՑ»

### Արցախը երբեք չի վերադառնա Ադրբեջանի տիրապետության տակ

Ֆրանսիայի հայկական կազմակերպությունները համակարգող խորհրդի համանախագահ Մուրադ Փափազյանը եւ Ֆրանսիայում Ադրբեջանի դեսպան Էլչին Ամիրբաեւը ապրիլի 7-ի երեկոյան France 24 հեռուստաալիքով բանավեճ պետք է ունենային՝ կապված դարաբաղա-ադրբեջանական շփման գծում ստեղծված իրավիճակի հետ, սակայն Փափազյանն ավելի ուշ հայտնեց, որ դեսպանը հրաժարվել է մասնակցել հաղորդմանը: Ապրիլի 11-ին բանավեճն, այնուամենայնիվ, տեղի է ունեցել:

Էլչին Ամիրբաեւը նշել է, թե իբր Հայաստանի դեսպանը չի ցանկացել իր հետ բանավիճել, սակայն ինքը համաձայնել է, որ հակառակվի Ֆրանսիայում հայկական լրբբի ապատեղեկատվական քարոզչությանը:

Լրագրողի հարցին, թե ինչու է խախտվել 1994-ին հաստատված հրադադարի ռեժիմը, նա պատասխանել է, որ Հայաստանի Հանրապետությունը զավթել է ադրբեջանական տարածքներ, այդ թվում՝ ԼՂ-ն, դրանք օտար՝ հայկական բանակի վերահսկողության տակ են, իսկ հրադադարը խախտվեց, որովհետև Հայաստանը շարունակում է ագրեսիան ու ցանկանում է ընդլայնել գրաված տարածքները, փորձում է շարունակել Եթնիկ գոտիները, որոնք իբր տեղ են գտել հակամարտության ընթացքում, նշում է, այսպես կոչված, հոջալուի ցեղասպանությունը:

Ի պատասխան, Մուրադ Փափազյանը նշում է, որ դեսպանը, իր առջեւ նստած, շարունակում է ադրբեջանական քարոզչությունը՝ հիմնված ստի վրա: Նա ընդգծում է, որ հրադադարի ռեժիմի խախ-

տումները այս 10 օրվա ընթացքում չեն, որ տեղի են ունենում, դրանք միշտ էլ շարունակվել են այս ընթացքում, իսկ Ադրբեջանը հրաժարվում է սահմանի երկայնքով տեղադրել հրադադարի խախտումներն արձանագրող Էլեկտրոնային սարքեր, ինչպես առաջարկում է ԵԱՀԿ-ն: Փափազյանն ընդգծում է, որ իրականում հայ բնակչության ոչնչացումը Ադրբեջանում սկսվել է դեռեւս 1988-ից: Ստալինը 1923 թվականին հայկական Լեռնային Ղարաբաղը շնորհել է Ադրբեջանին, իսկ 1988-ին, հենվելով խորհրդային սահմանադրության տված հնարավորության վրա և առաջնորդվելով ժողովրդավարության հիմունքներով, ԼՂ ժողովուրդը խաղաղ ճանապարհով՝ հանրաքվեով, որոշեց միանալ Հայաստանին: Այդ խաղաղ քայլին Ադրբեջանը պատասխանեց կոտորածներով՝ Սոււզայիթում, Բաքվում, Կիրովբադում, Շուշիում, և ամբողջ աշխարհն է դա հիշում:

Երբ լրագրողը նշում է, թե Լեռնային Ղարաբաղը միջազգային հանրությունը համարում է ադրբեջանական տարածք, Փափազյանը բացատրում է, որ 1994 թվականին ստեղծված Մինսկի խմբի առաքելությունն այդ հարցին լուծում գտնելն է: Սակայն այդ թվականից ի վեր Ադրբեջանը մերժում է խաղաղ կարգավորման բոլոր ծրագրերը:

Ադրբեջանի դեսպանի փորձը՝ «ապացուցել», թե Ղարաբաղը երբեք էլ պատմականորեն հայկական տարածք չի եղել, այլ մշտապես պատկանել է Ադրբեջանին, կասեցվում է լրագրողի կողմից, նա պնդում է, որ բանավեճի թեման ոչ թե պատմությունն է, այլ իրավիճակի ներկայիս սրումը սահմանին: Նա հարևցում

է, թե արդյո՞ք ճիշտ չեն պնդումները, որ Ալիեւը, ով հայտնի չէ որպես մեծ ժողովրդավար, երկրի սոցիալ-տնտեսական բարդ վիճակը ընդարկելու, իր ժողովրդին շեղելու համար կիրառում է ազգայնականության խաղաքարը: Դեսպանը պատասխանում է, որ կատարյալ ժողովրդավարություններ չկան, ապա հավելում է, որ ԵԱՀԿ ՄԽ համանախագահ երկրների նախագահները նույնպես ստատուս քվոն համարում են անընդունելի, և միջազգային հանրությունն իրենց կողմից է: Լրագրողը հարցնում է՝ արդյո՞ք դրա պատճառը ստրատեգիական հետաքրքրությունը չէ՞ նավթը, գազը, որոնք Թուրքիայով հասնելու են Եվրոպա: Դեսպանը պատասխանում է, թե դա միայն նշանակում է միջազգային օրենքներ հարգել: Նա պնդում է, թե իբր իրենք փորձել են խաղաղ միջոցներով լուծել խնդիրը, սակայն Հայաստանն ամեն ինչ անում է ստատուս քվոն՝ «տարածքների օկուպացիան» ամրապնդելու համար:

Լրագրողը բանավիճող կողմերին առաջարկում է կարգավորման լուծում առաջարկել: Ըստ Փափազյանի՝ հարկավոր է միջազգային հանրության հովանու ներքո ինքնորոշման հանրաքվե անցկացնել, ինչը բնականաբար անընդունելի է համարում Ադրբեջանի դեսպանը, ըստ որի՝ այդ տարածքները «գտված են ադրբեջանացիներից», և հանրաքվեն չի համապատասխանի միջազգային օրենքներին:

Փափազյանը նշում է, որ Ադրբեջանի սանձազերծած պատերազմում հաղթել են հայերը՝ հողագործ դարաբաղցիները, ովքեր շատ ծանր վիճակում են ապրել

Ադրբեջանի տիրապետության տակ: Նա շեշտում է, որ Ադրբեջանը բռնատիրական, ոչ ժողովրդավար երկիր է, հիշեցնում է Ալիեւի ռազմաշունչ հայտարարությունները, նաև՝ Ռուսաստանում Ադրբեջանի դեսպան Բյուլ Բյուլ օլլիի խոստովանությունը, որ Ադրբեջանն է խախտել հրադադարի ռեժիմը ու վերսկսել ռազմական գործողությունները:

Ի դեպ, Ադրբեջանի դեսպանը անգամ այս բանավեճում է ակնարկում, որ իր երկիրը ամենեւին էլ հակված չէ հակամարտության խաղաղ լուծմանը: Նա հայտարարում է, որ «այժմ 1992 թվականը չէ, այլ՝ 2016-ը, և Ադրբեջանը չի հանդուրժի իր տարածքների շարունակվող օկուպացիան»: Որպես լուծում՝ առաջարկում է ընդունել ՄԱԿ-ի «օկուպացիան» դատապարտող 4 բանաձեւերը, Բուդապեշտի՝ կարգավորման փուլային տարբերակը, ՀՀ զինված ուժերը դուրս բերել «օկուպացված տարածքներից», 1 մլն ադրբեջանցի փախստականներին վերադարձնել բնակության հին վայրերը, հետո միայն խոսել Ղարաբաղի ժամանակավոր կարգավիճակի մասին: Ընդ որում, ըստ նրա, Ադրբեջանը դարաբաղյան կողմ, որպես այդպիսին, չի ընդունում, քանի որ, ըստ նրա, ԵԱՀԿ ՄԽ շրջանակում կա 2 կողմ՝ Հայաստան և Ադրբեջան:

Մուրադ Փափազյանը դարձյալ շեշտում է, որ ԼՂ-ն պատմական հայկական տարածք է՝ բնակեցված հայերով, և խաղաղ գործողությամբ՝ հանրաքվեով, իր անկախությունն է հռչակել՝ ի պատասխան ստանալով կոտորածներ, և երբեք չի վերադառնա Ադրբեջանի տիրապետության տակ:

yerkir.am

### Հայրապետական օրհնություն՝ նվիրված Արցախին ու հայոց բանակի զինվորներին

Գանձասարի Սուրբ Հովհաննես Սկրտիչ եկեղեցում Ն.Ս.Օ.Տ.Տ. Գարեգին Բ Ծայրագույն Պատրիարք եւ Ամենայն Հայոց Կաթողիկոսը եւ Ն.Ս.Օ.Տ.Տ. Արամ Ա Մեծի Տանն Կիլիկիոյ Կաթողիկոսն իրենց հայրապետական օրհնությունն են տվել Արցախին ու հայոց բանակի զինվորներին:

Հայրապետական օրհնությանը ներկա էին Հայ առաքելական եկեղեցու Արցախի թեմի առաջնորդ Պարգեւ արքեպիսկոպոս Մարտիրոսյանը, ԼՂՀ Ազգային Ժողովի նախագահ Աշոտ Ղուլյանը, ԼՂՀ ԱԺ փոխնախագահ Վահրամ Բալայանը, ԼՂՀ ԱԺ մի շարք պատգամավորներ, պաշտոնատար այլ անձինք, ԼՂՀ ՊԲ բարձրաստիճան սպաներ եւ զինվորներ:

Հայոց երկու կաթողիկոսներն աղոթել են Արցախի խաղաղության ու հայ զինվորի անվտանգ ծառայության համար:

Ն.Ս.Օ.Տ.Տ. Գարեգին Բ Ամենայն Հայոց կաթողիկոսը, դիմելով ժողովրդին, ասել է.

«Հակառակորդի դեմ ելավ անկախության սերունդը՝ պաշտպանելու իր հայրերի քաջագործությամբ ու հերոսական ոգով կերտված Արցախի անկախությունը: Այդ սերնդի մեջ իրենց հայրերի, Ավարայրի ու Սարդարապատի ոգին է: Նրանք կտրիճներ եղան պատերազմի մեջ ըստ առաքելական խոսքի եւ հաղթեցին, քանզի ամեն ոք, որ Աստուծուց է ծնված, հաղթում է աշխարհում»:

Մեծի Տանն Կիլիկիոյ Արամ Ա կաթողիկոսն իր խոսքում ասել է, որ առաջին ան-

գամ է Արցախում, սակայն, որպես մատուցող ներկայություն, Արցախը մշտապես իր սրտի ու հոգու մեջ է: «Խոնարհվում եմ բոլոր այն հերոս զինվորների հիշատակի առջեւ, ովքեր իրենց թանկ արյունը հեղեցին հայրենիքի պաշտպանության ճանապարհին:

Արցախը մեր ժողովրդի համար վավերական հայրության, ամուր հավատքի,



պայծառ տեսիլքի հոմանիշ է: Արցախյան գոյամարտը ցույց տվեց, որ հայությունը բարձրագույնս գիտի իր հայրենիքի գինը եւ նվիրվածությամբ ու քաջությամբ պաշտպանում է այն: Մենք եկել ենք ասելու, որ մեր եկեղեցին հայ ժողովրդի, ազատության ու արդարության հետ է: Մենք զինված ենք մեր հավատքով, մշա-

կույթով ու զենքով՝ հանուն մեր ազատության եւ իրավունքների պաշտպանության: Պատմությունը ցույց է տալիս, որ Ավարայրից սկսած՝ մեր պատմության բոլոր Ավարայրերում՝ մինչեւ Սարդարապատ, մինչեւ Ղարաբաղի ազատագրումը եւ մինչեւ այսօր մեր եկեղեցին կանգնեց մեր ժողովրդի կողքին, որովհետեւ եկեղեցին ժողովրդի եկեղեցին է, ժողովուրդն է

հայրենիքի ազատության, մեր իրավունքի պաշտպանության:

Պատմության մեջ երբեք չենք փորձել խախտել ուրիշների իրավունքները, բայց երբ փորձել են մեր իրավունքը խախտել, որպես մեկ ամբողջություն, վասն հայրենյաց պատերազմի դաշտ ենք նետվել: Այս է հայոց պատմության խորհուրդը»,- ասել է Արամ Ա կաթողիկոսը:

Արցախի թեմի առաջնորդ Պարգեւ արքեպիսկոպոս Մարտիրոսյանը, դիմելով ներկաներին, նշել է, որ Հայոց երկու կաթողիկոսները եկել են մեզ գոտեպնդելու, գորավիզ կանգնելու, որպեսզի մենք, գոտեպնդված լինելով հայրական հորդորներով, գոտեպնդիչ օրհնությամբ շարունակենք մեր առաքելությունը:

«Հերոսական պահին մենք վկա ենք այս պատմական իրադարձությանը, երբ որ Հայոց հայրապետները մեր կողքին են, մեզ հետ են եւ եկել են Աստուծո անուսից մեզ գորացնելու, ինչը նշանակում է, որ մենք պետք է հաղթենք ու հաղթելու ենք, ապահովելու ենք մեր խաղաղությունը»,- ասել է Արցախի թեմի առաջնորդը:

Վեհափառ հայրապետներն այնուհետեւ այցելել են Գանձասարի Մատենադարան, ծանոթացել այնտեղ պահվող հայ մատենագրության ու մանրանկարչության նմուշներին:

Հաջորդ օրը՝ ապրիլի 14-ին վեհափառ հայրերը պատարագ մատուցեցին Նաեւ Շուշիի սբ. Ղազարէացեց եկեղեցում:

«ԱՄՍՈՒՑ»

### Կին կապիտանը ոչնչացրել է թշնամու անօդաչու սարքը



սպասում էին պատվիրված մեքենաները,- պատմում է Մելսիդան: - Ամբողջ գիշեր ռմբակոծությունները չէին դադարում: Առավոտյան վերջին բնակիչներին տարհանելուց հետո՝ ամուսնուս հետ շտապեցինք զորամաս: Մեքենա չկար. այդ պատճառով Մարտակերտից մինչեւ Մատաղիս ահագին տարածություն անցել ենք ոտքով, մինչեւ մեքենայի հայտնվելը»:

Արդեն մի շաբաթից ավելի է, ինչ Մելսիդայի անկողնուն փոխարինել է աթոռը, իսկ գլխատեղը սեղանն է: Չի բողոքում: Միակ խնդրանքը փոքր համարի զինվորական կոշիկներն են. «40 համարից փոքր կոշիկ չկա: Նույնիսկ մի քանի գուլպաներով հանգնելուց՝ մեծ են: Զայլելը դժվար է այս կոշիկներով, էլ չեմ խոսում վազելու մասին»,- ասում է նա:

Մելսիդան 91 թվականից մասնակցել է Արցախյան պատերազմին: Նա եւ հետախուզության է գնացել, եւ մասնակցել մարտերին, եւ օգնել վիրավորներին: Նա մասնակցել է Շոշի, Շուշիի, Լաչինի, Զարվաճառի, Մարտակերտի ազատագրման մարտերին, 1,5 տարի կռվել Շահումյանում՝ ադրբեջանցիների թիկունքում: Պատերազմի ժամանակ Մելսիդան 2 անգամ ծանր վիրավորվել է, 3 անգամ կոնտուզիա ստացել: Նրա ճակատին փամփուշտից մնացած սպի կա: Նրա մարմնից 24 բեկոր են հանել, որից 4-ը Մելսիդան ինքն է հանել «եղնիկներում»: Երեք բեկոր էլ դեռ մնում է ազատամարտիկ կնոջ մարմնում:

Պայմանագրային զինծառայող Նորայրի ձեռքերն ականից վնասվել են, մի քանի օրով Նուղարկել են զորամաս ապաքինվելու: Տեղը տեղ չի տալիս, ուզում է շուտ գնալ ընկերների մոտ: Դեպքի մասնաբանությունները չի պատմում, տեսախցիկը տեսնելուս պես՝ շրջվում է, ընկերներն ասում են, որ նկարվել չի սիրում:

«Մի քանի օր առաջ անօդաչու սարք

եր հայտնվել զորամասի վերելում, մինչեւ մենք գործի անցնենք, Մելսիդան վերցրել էր զենքը եւ մի քանի ռոպեներ անց ոչնչացրել սարքը»,- պատմում է Նորայրը:

«Հրամանատարին խնդրեցի, որ թույլ տա դիրքեր բարձրանամ, չեմ կարող այստեղ հանգիստ նստել: Համ էլ տղաներին ոգեւորելու եւ թիկունք կանգնելու խնդիր կա: Սակայն չթույլատրեց: Հաջորդ օրը Նորից մոտեցա, այս անգամ ասաց՝ համբերիր,- խռովված, բայց իրաման օրենք համարելով շարունակում է Մելսիդան,- ախր կիսատ մնացած գործը պիտի ավարտենք եւ մեզ պատկանող հողերն ազատագրենք: Այն ժամանակ չպետք է ընդունեինք խաղաղության դաշինք, մենք պետք է առաջ գնայինք, որ



այսօր նման խնդիր չունենայինք եւ մեր տղաները չզոհվեին առաջնագծում...»:

Մելսիդայի ամուսինը, ինչպես Մելսիդան է ասում, առաջին իսկ օրվանից իր հետ է: Նա Մարտակերտի ՀԵԿ-ի հսկիչն է, միաժամանակ ամեն ինչով օգնում է զորամասում:

Ամուսինը հպարտությամբ պատմում է, որ կինն Արցախյան պատերազմի ժա-

մանակ ոչնչացրել էր տասնյակ ադրբեջանցիներին:

Մելսիդա Հարությունյանը պարգևատրվել է «Մարտական ծառայություն» եւ «Շուշիի ազատագրման համար» մեդալներով, «Մարտական խաչի» շքանշանակապիր է: Ստացել է կապիտանի կոչում:

Ամուսինները երեխաներ չունեն, բայց ճակատում կռվող բոլոր տղաներին իրենց զավակներն են համարում:

«25 տարի է՝ ապրում եմ Արցախում, եւ 25 տարի բանակ գնացող-եկողներն իմ որդիներն են: Այստեղ իմը, քոնը չկա: Աստված ինձ այս ամբողջ բանակ երեխաներին է տվել, ու ես երջանիկ եմ դրանով»,- ասում է կին կապիտանը:

Սուրճը եռաց: Մելսիդան մատուցում է

մեզ, հյուրասիրում նաեւ կոնֆետներով եւ քաղցրաբլիթով:

«Նույն այս քաղցրաբլիթներն ու կոնֆետներն ուտում են նաեւ մեր սահմանը պահող զինվորները: Աստված թող խնայի նրանց, դեռ շատ գործ ունենք... համեք սուրճը, իսկ հաջորդ անգամ սուրճը կհյուրասիրեմ Բաքվում...»,- ասում է նա:

Լ. ԹԵՎՈՍՅԱՆ

# Մարտակերտի շրջանն ապրիլյան քառօրյա պատերազմից հետո...



Ապրիլյան քառօրյա պատերազմի ընթացքում ադրբեջանական կողմը հրետակոծել է Մարտակերտի մի շարք բնակավայրեր: Հրետակոծության հետևանքով վնասվել է Մատաղիսի ՅԷԿ-ը, Թալիշի, Մատաղիսի եւ Մարտակերտի դպրոցներն ու մանկապարտեզները, տասնյակ տներ հակվել են շարքից:

## Ծնվել եմ Մարտակերտում, Մարտակերտում էլ պիտի մեռնեմ

Մարտակերտի Պարույր Սեւակ թաղամասում ապրող Գուրգեն Նալբանդյանի եւ կնոջ համատեղ ուժերով 40 տարի առաջ կառուցված տունն ապրիլի 3-ին հրետակոծության հետևանքով վնասվել է:

Գուրգենը տան միակ բնակիչն է. կինը մահացել է 5 տարի առաջ, աղջիկներն ամուսնացած են: Դեպքի պահին Գուրգեն Նալբանդյանը տանը չէր: «Վարչակազմի շենքում էի. ծանոթներիցս մեկն ասաց, որ տունս վնասվել է: Դու մի ասա՛՛ ոչ թե վնասվել է, այլ տնիցս բան չի մնացել», - ասում է նա:

Տան խոհանոցը եւ բաղնիքն ամբողջությամբ ավերված են, վնասվել են նաեւ պատշգամբն ու դարպասը:

«Տունը կառուցվում ու վերանորոգվում է, իսկ մարդուն հնարավոր չէ վերակառուցել: Փառք Աստծո՛՛ այդ պահին տանը չէի, - ասում է 77-ամյա Գուրգեն պապը եւ նշում, որ թեկուզ աղջիկները պնդում են, որ իրենց մոտ տեղափոխվի, սակայն գնալու մտադրություն չունի. - թող մեր թշնամին խելքը գլուխը հավաքի, մենք այստեղից գնացողը չենք. ես ծնվել եմ Մար-

տակերտում, Մարտակերտում էլ պիտի մեռնեմ»:

Գուրգեն Նալբանդյանի տան վերանորոգման աշխատանքներն արդեն սկսվել են:

## Քառօրյա պատերազմի հետևանքով վնասված կենցաղային տեխնիկաների խնդրի լուծումը ստանձնել է պետությունը:

Մատաղիսում մնացած միակ ընտանիքը, կենդանիներն ու գունավոր կավիճները...

Քառօրյա պատերազմի վերսկսումից մի քանի ժամ հետո Մատաղիսի բոլոր բնակիչները տարհանվել են: Համայնքում մնացած միակ բնակիչները Գայանեն եւ իր ամուսինն էին:

«Կրակոցները սկսվեցին ուշ գիշերով, այնուհետեւ հրետակոծել են նաեւ գրադ կայանքից: Ականն ընկավ մեր պատշգամբի դեմը: Բնակիչներով որոշեցինք իջնել նկուղ, սակայն սպայական շենքերի նկուղներից մեկն էր նորմալ վիճակում, մնացածը ջրալցված էին, այդ պատճառով բնակիչները ստեղծեցին մեքենաներն ու շարժվեցին Ստեփանակերտ, - պատմում է Գայանեն:

Մատաղիսում հոսանք չկար: Հիմա, երբ հոսանքը տվել են, դիմացի շենքի բնակարանների լույսերը, քանի որ է վառվում են: Մարդիկ չեն հասցրել նույնիսկ լվացքը հավաքեն: Բակում կան մի քանի զինծառայողների մեքենաներ, ովքեր դիրքերում են: Բացի մեքենաներից, բակում կարող ենք հանդիպել կովերի նախիրի, մի քանի այծի, հավերի եւ անվտանգության նկատառումներով գյուղում թողած՝ բծիչ գինձառայողի շանը:



տակերտում, Մարտակերտում էլ պիտի մեռնեմ»:

Կրած վնասների չափերը գույքագրել է ԼԴՀ Աշխատանքի եւ սոցիալական հարցերի նախարարության աշխատանքային

Գայանեի ամուսինը թոշակի անցած զինծառայող է: Այս օրերին տեղափոխվել են «Վերին Մատաղիս»-ի տներից մեկը: «Այնտեղ համեմատաբար ապահով է», - ասում է ամուսինը: Ամուսիններն օգ-

նում են գործառնում աշխատող կնոջը՝ ճաշ պատրաստել գինովների համար:

Ամուսիններն երեք գավակ ունեն: Կրտսեր որդին Մատաղիսում էր դեպքի օրը. ապահովության համար ծնողներն ուղարկեցին քույրերի մոտ, ովքեր սովորում են Ստեփանակերտում:

«Վիճակը մի քիչ հանդարտվի՛ կբերենք երեխային: Հարեւաններիս հետ էլ եմ ամեն օր խոսում. բոլորն ուզում են շուտ տուն վերադառնալ...»,- բակում քամուց շարժվող մանկական ճոճանակի ճռճոցն ընդհատում է մեր զրույցը: Գայանեն ցույց է տալիս պատուհանագոգին շարված խաղալիքները, - երկրորդ հարկի հարեւանս 20 օր է, ինչ տուն է ստացել եւ տեղափոխվել. չի էլ հասցրել վայելել այն: Այստեղ ապրող բոլոր զինծառայողներն առնվազն 2 գավակներ ունեն, այդ պատճառով բակում միշտ աշխույժ մթնոլորտ էր տիրում...»:

Իսկ բակում գտանք պայթած գնդակ, որը գուցե հրետակոծության հետևանքով է փչացել: Անտեր էին մնացել նաեւ գունավոր կավիճները... Մանկական ճո-

ւտեղափոխվել Մարտակերտ: Ասում է՝ գնալու տեղ չունեմ:

«Կրակոցներ միշտ էլ եղել են, բայց կարծում էիք, որ այս անգամ էլ իրավիճակը կհանդարտվի: Սակայն մենք չենք վախենում: Իմ որդին առաջնագծում է, ինչո՞ւ պիտի վախենամ. նրանք մեր սահմաններն ամուր են պահում, իսկ մենք կանգնած ենք նրանց թիկունքին»:

«Ամեն ինչ լավ է լինելու. եթե այդպես չմտածեի, Մարտակերտում չէի մնա, - ասում է Անահիտը եւ շեշտում,- հայությունը միասնական է, այդ պատճառով մենք ոչ մի բանից չենք վախենում...»:

## Թշնամին վնասել էր նաեւ Մատաղիսի հիդրոէլեկտրակայանը

Հիդրոէլեկտրակայանների աշխատանքի համար բարենպաստ եղանակներ են: Մատաղիսի ՅԷԿ-ն այս եղանակներին 24 ժամվա կտրվածքով տալիս է 130-160 հազար կիլովատ էներգիա, սակայն քառօրյա պատերազմի ժամանակ թշնամու հրետակոծությունների հետևանքով ՅԷԿ-ի աշխատանքը խափանվել է:



ճանակն էլ քամուց անընդհատ այս կողմ այն կողմ է շարժվում...

Մանկական խաղահրապարակում, ի հեճուկս պատերազմի, որոշ ժամանակ հետո, անշուշտ, նորից կաշխուժանա խաղը, երբ վերադառնան փոքրիկները... Վերադարձը չի ուշանա...

Փետրվարի 16-ին Մարտակերտի շրջանի Մատաղիս ավանում տոնական տրամադրություն էր. 24 սպաների ընտանիքների համար բնակարանամուտ էր: Մատաղիսի զինվորական շենքերում ապրում է շուրջ 100 ընտանիք:

## Ամեն ինչ լավ է լինելու. եթե այդպես չմտածեի, Մարտակերտում չէի մնա...

Անահիտ Հայրապետյանը Մարտակերտ քաղաքի բնակչուհի է: Չափակներից երեքն ամուսնացած են, փոքրը 16 տարեկան է. աղջիկն ապրում է իր հետ:

«Գիշերվա ժամը 3-ին աղջիկս արթնացրեց ինձ. լսեցի կրակոցների եւ մեքենաների ձայներ: Պատուհանից նայեցի եւ տեսա, որ ժողովուրդը, մեքենաների մեջ խցկված, մեքենաներն են լիցքավորում ու շարժվում՝ չգիտեմ որտեղ», - պատմում է Անահիտը, ում տունը Մարտակերտի բենգալցակայանի կողքին է:

Անահիտը Մարտակերտից քառօրյա պատերազմի օրերին չի հեռացել, միայն թոռնիկներին տեղափոխել է Արջածոր գյուղ՝ բարեկամների մոտ:

Նա Արարատի մարզից 11 տարի առաջ

«Մարտակերտի ջրամբարի ջուրը լրիվությամբ չի օգտագործվում եւ մենք ջուր ենք կորցնում, իսկ եթե ջուր ենք կորցնում, ապա կորցնում ենք նաեւ փող», - ասում է Մատաղիսի կասկադի տեղամասի պետ Սերգեյ Դրաոյանը:

Ապրիլի 2-ի առավոտյան արկն ընկավ ՅԷԿ եւ վնասեց երեք շարժիչներից մեկը: Ծեղքում հրդեհ բռնկվեց, սակայն, բարեբախտաբար, գեներատորը չպայթեց, իսկ աշխատողներն արագ կողմնորոշվեցին եւ հանգրվան հրդեհը: Աշխատողներից ոչ մեկը չի վնասվել:

Վնասվել է հիդրոէլեկտրակայանի առաստաղը, ապակիները ջարդվել են, շենքի վրա «Մատաղիս 1» գրության տառերը պոկվել եւ թափվել են ջրամբար:

«Դրանից հետո էլ թշնամին շարունակում էր հրետակոծությունը, սակայն ՅԷԿ-ը չի վնասվել: Վնասվել է պահակակետը, «Արցախ ՅԷԿ»-ի ութ բնակարանաց շենքը», - նշում է Ա. Դրաոյանը:

Խաթարվել էր բջջային էլեկտրականության օդային գիծը: Տեղամասի պետի խոսքերով՝ մի քանի օրից կանցնեն աշխատանքի. շինարարները պետք է վերականգնեն առաստաղը, մասնագետները ստուգեն շարժիչները, պետք է փոխվեն ապակիները:

Մատաղիսի ՅԷԿ-ը գործում է 2012 թվականից: ՅԷԿ-ն ունի 48 աշխատող:

L.Թ

### Գեւորգ Մանուկյանի առաջին կրակոցից խոցվեց թշնամու ռազմական ուղղաթիռը



պայմանագրային զինծառայող Գեւորգ Մանուկյանը, ով առաջին անգամ էր «Իգլա» շարժական զենիթահրթիռային համալիրից կրակում: Այնուհետև կես կատակ, կես լուրջ ավելացնում է. - Մեր դիրքերի ուղղությամբ ապրիլյան պատերազմը տեւեց մեկ օր: Այդ դեպքից հետո մեր դիրքերի ուղղությամբ հակառակորդի հարձակումներն ու կրակոցները դադարեցին»:

Ճնշումով Շիրակի մարզի 3-րդ գյուղից է Գեւորգը: 21 ամիս է, ինչ ծառայում է ԼՂՀ Պաշտպանության բանակում:

Խոսելով դիրքապահների մասին՝ նշում է, որ տղաների մարտական ոգին բարձր է, ամեն ինչ լավ է, եւ բոլորն էլ պատրաստ են առաջ գնալու...

«Սահմանը պահող յուրաքանչյուր զինվոր առաջին հերթին պաշտպանում է իր ընտանիքը: Իհարկե, յուրաքանչյուրն ունենում է վախի զգացում, սակայն այդ վախը գործոն չի հանդիսանում, որպեսզի որեւէ մեկը կոտորվի: Այդ վախն էլ հարաբերական է՝ վախենում ես ոչ թե սեփական անձիդ համար, այլ քո ընտանիքի, քո ընկերների համար: Այն պատվի եւ պատասխանատվության զգացումը, որ մեր նախնիները մեր հողը արյան գնով են պահել, նույնպես մեզ տանում է դեպի կռվի դաշտ եւ ստիպում ավելի զգոն եւ պարտավորված լինել»,- շեշտում է Գեւորգը:

Գրավված դիրքերի մասին՝ Գեւորգն ասում է, որ դա զինվորների ընկճման պատճառ չի կարող հանդիսանալ, հա-

կառակը՝ պատճառ են՝ ավելի կազմակերպվելու: Նրա կարծիքով՝ ավագ սերնդի ներկայությունը երիտասարդ սերնդին ավելի ուժեղ եւ հանգիստ է դարձնում:

Մինչեւ քառօրյա պատերազմի վերսկսելը հարազատների հետ երեք ամիս չէր խոսել: Ճնողներին զանգելու հնարավորություն ընձեռնվեց միայն ամսի 12-ին՝ հակառակորդի երկու ուղղաթիռ եւ հինգ տանկ խոցած զինծառայողների պարգևատրության օրը: Չինծառայողներ Գեւորգ Մանուկյանին, Մարատ Պետրոսյանին եւ Նարեկ Մալխասյանին հերոսության համար պարգևատրեցին մեքենաներով: Մի քանի ժամ տեւած միջոցառումից հետո հերոսներն շտապեցին առաջնագիծ՝ շարունակելու ծառայությունը:

«Ծառայությունս ավարտելուն պես իմ մեքենայով կգնամ տուն, արդեն մտքում

պատկերացնում եմ մայրիկիս ուրախությունն ու հայրիկիս հպարտությունը»,- ասում է Գեւորգը:

Չինծառայող բոլոր որդիների ծնողներին համբերություն եւ հավատ է մաղթում: «Համբերություն, որպեսզի դիմանան՝ մինչեւ իրենց որդիների տունդարձը, եւ հավատ, որ մենք ամենակարողն ենք եւ ամուր կպահենք մեր հայրենիքի սահմանները»,- շեշտում է Գ. Մանուկյանը:

Գեւորգը, խոսելով ապագայի մասին, նշում է. «Մարդ պետք է հստակ նպատակներ ունենա, այլ ոչ թե երազանքներ: Ես իմ նպատակներն ունեմ. պիտի ավարտեմ ուսումս, աշխատանքի անցնեմ, ընտանիք կառուցեմ եւ շատ երեխաներ ունենամ, ովքեր պիտի ապրեն հզոր Ազատ, Անկախ, Միացյալ Հայաստանում...»:

Լուսինե ԹԵՎՈՍՅԱՆ



### Պապերի սպանությունը ներվում է, երեխաներինը՝ երբեք

ԼՂՀ ՊԲ-ից հայտնեցին, որ հայկական կողմին վերադարձված մեր 18 տղաների դիերը խոշտանգված են՝ բոլորը: Ադրբեջանի ՊՆ-ն, ստանալով իր 13-ի դիերը, չի նշել խոշտանգումների մասին, անգամ՝ մեկ դիակի պահով: Մենք նրանց դիերը չենք խոշտանգել, ոչ մեկի-նրը:

Այս օրերին Բաքվի հայկական եկեղեցու բակից ոչ մի ադրբեջանցի լրագրող ռեպորտաժ չարեց: Չկա այդ եկեղեցին, եղել է, բայց էլ չկա:

Այս օրերին լրագրող Թաթուլ Հակոբյանը ռեպորտաժ պատրաստեց Ադրբեջանի ադրբեջանական միևարթության: Եղել է այդ մզկիթը եւ հիմա էլ կա:

Փոխարենը Ջուղայի խաչքարերը չկան, եւ Սողոմոն Զոչարյանը չկա, որին ցմահ ազատագրվել էին իրանահպատակ ադրբեջանցու սպանելու համար, եւ ով բոլորովին վերջերս մահացավ: Ազատագրվել էին, քանի որ Հայաստանում ադրբեջանցի սպանելն էլ է հանցագործություն: Բայց Ռամիլ Սաֆարով կա, ով կացնահարել էր Գուրգեն Մարգարյանին, եւ որին ցմահ էլ չեն ազատագրվել, ազատություն են տվել, քանի որ Ադրբեջանում հայ սպանելը հանցագործություն չէ:

Ադրբեջանն ագրեսոր է, բայց ոչ ոք այդ մասին ոչինչ չի հայտարարում:

Մենք ագրեսոր չենք, բայց մեր ագրեսոր չլինելու մասին ոչ ոք չի հայտարարում:



Ու մենք իրար նման ենք դառնում, աշխարհում իրար նման ենք ընկալվում, տարբերություն չկա՝ հա՞յ է, թե՞ ադրբեջանցի: Ագրեսոր է, թե՞ զոհ: Բայց եթե չկա այս տարբերությունը, ուրեմն ինչո՞ւ նրանց դիերից ոչ մեկը... Ադրբեջանի մզկիթն ու միևարթը... Հայաստանում

ադրբեջանցի սպանելը...

Ես գիտեմ ու բոլորս էլ գիտենք, թե՞ ինչու, բայց արժե՞ եւ դեռ որքան արժե՞, էլ ի՞նչ պետք է լինի, որ ասենք՝ հերիք է, մեր դպրոց գնացող երեխաների՞ս պետք

րազմել՝ մի ամբողջ հարյուր տարի, բայց հիմա հաշտ, համերաշխ ապրում են: Մենք թուրք-ադրբեջանցու հետ նույնն անել չենք կարող, որովհետեւ նրանք մեր պապերին չեն սպանել, նրանք մեր երեխաներին են սպանում: Պապերի սպանությունը ներվում է, երեխաներինը՝ երբեք: Երեխաներն ավելի սիրելի չեն, պարզապես երեխաները հիմա են, հենց մեզ հետ են, մեզնից «հետո»-ն են: Նրանց սպանությունը մեր աչքի առջեւ է կատարվել, ոչ թե մեզ պատմել են, նրանց սպանությունը մարդասպանություն չէ, ցեղասպանություն է: Իսկ ցեղասպանությունը կա՞մ իսպառ վերացնում է, կա՞մ հավերժ թշնամացնում: Ցեղասպանողն էլ երկու տեսակի է լինում՝ գերմանացու տեսակը եւ թուրքի տեսակը: Գերմանացու տեսակին կարելի է դատել՝ ազդվում է, զոջում է, զիջում է, փոխհատուցում է, թուրքին հնարավոր չէ դատել... Թեեւ պետք է նշել, որ ցեղասպանվածի էլ երկու տեսակ կա՝ հրեա տեսակը եւ հայ տեսակը: Հրեան կարողանում է ազդել, զոջացնել, զիջում կորցել, փոխհատուցում ստանալ, հայը չի կարողանում:

Ու ռուսը մեղավոր չէ...

Հովիկ ԱՅՅՅԱՆ